



Kamis, 18 Agustus 2022

Ogen: Johanes 8:33-36



Tuhu-Tuhu Enggo Bebas



“Sekali merdeka tetap merdeka...” kata enda usur si begi bas kemerdekaan. Kalak si ikut i bas mperjuangkan kemerdekaan ngidah maka kemerdekaan e meherga. Perbahan ergana e maka arus tetap ijaga dingin ipertahankan segelah lanai ijajah mulihi. Erdandanken si enda me maka mekattep ibelasken kata-kata e.

Wari enda Tuhan Jesus ngataken maka kalak situtus ngikutken kai siniajarkenNa e me tuhu-tuhu ajar-ajarNa. Janah ajar-ajarNa nge nandai Dibata si mereken kebebasan. Ise si ndalanken si ngena ate Dibata e me kalak si merdeka janah igelari pe anak Dibata. Tapi ise si erbahan si la ngena ate Dibata e jadi budak dosa. Anak Dibata e enggo tuhu-tuhu mereken kebebasan maka tuhu-tuhu enggo bebas.

“Tuhu-tuhu bebas” ngatakenca maka kebebasan labo mitasi, tipuan entah ranan ngenca bebas tapi situhuna iperbudak denga. Bebas berati lanai ibayang-bangi kebiaren, ngasup ncidahkan arah karya nyata ise kin dirina situhuna. Kalak bebas ngasup pe mbebaskan kalak sideban, e maka bas ia ndalanken orat ngeluh sienggo ibahan pemerentahen lanai jadi sada beban keterpaksaan. Itehna ia kalak bebas maka idalanken me aturen e guna kiniulin geluh enterem jelma.

Senina moria, sigejapken maka kita enggo bebas bas negara si merdeka. Arah kebebasan si enggo sialoken kita e mereken rumat man banta segelah ngasup mereken ngaruh nandang i bangsanta enda. Selaku nande bahanlah ngaruhta bas mendidik anak-anakta segelah meherga akapna kemerdekaan e. Kecibal si genduari melala anak-anak siteriket ku bas narkoba, pergaulen bebas, si erbahanca lanai atena tutus ndalani kegeluhen apai ka pehuliken bangsa enda. La kin enda sada bagin bas penjajahan bas jaman sigenduari? Katakenlah man dirita maka merga kemerdekaan enda, janah erjuang kita guna masa depan bangsata.